

ATENTATU SAIAKERA. Alderdi politikoei eraso gaitzetsi dute

Eibarko epaitegian ETak jarritako lehergailuak hiru kilo dinamita zituen

lazko irailean talde armatuak Britainian lapurtutako lehergaiak osatuta zegoen

Agentziak | **DONOSTIA**

Eibarko epaitegian jarritako lehergailu bat indargabetu zuen Ertzaintzak astearte gauerdian. Ertzaintzak 22:15ean jasotako dei batek ohartarazi zuen kirol poltsa susmagarri bat zegoela epaitegiaren aurrean, Bittor Sarasketa kalean. Minutu bat geroago Gara egunkariak SOS-Deiaki jakinarazi zion, ETaren izenean deitutako pertsona batek toki berean lehergailu bat zegoela ohartarazi zuela.

Ertzaintzak berehala lekua inguratu zuen; lehergailua indargabetzerako gauerdia pasatxo zen.

Eusko Jaurlaritzako Herri-zaingo Saileko iturriek jakinarazi zuten, joan zen urtean ETak Plevinen (Britainia) lapurtutako dinamita zeukan lehergailuak. Bonbak hiru kilo dinamita zuen. Titadine motakoa

zen eta erlojua ere jarrita zeukan.

Alderdien gaitzespena

Eusko Jaurlaritzako Justizia eta Lan sailburu Sabin Intxaurrek «zentzugabekeriatzat» jo zuen «Justiziaren zerbitzua bezalako ondasun eta zerbitzu publiko baten kontrako edozein eraso». «ETak behingoz egin behar duena da herriaren nahiari kasu egin. Herriak behin eta berriz esan du bakean utzi gaitzala eta taldea desegin dadila», adierazi zuen Intxaurrek. Horrenbestez, «guztion artean herri bat eraikitze» deia egin zuen.

EAKo idazkari nagusi Gorka Knörrek ere leherketa saiakera gaitzetsi zuen. ETari armak utz ditzala eskatu zion, bere jarduerak giza eskubideak urratzen dituela esanez. ETak, «EHren jarraipenarekin batera, euskal

abertzalearen gainera Espainiako inperialismoaren ekinbidetari oinarria jartzen dio».

Iñaki Anasagasti Diputatuen Kongresuko EAJren bozemaileak dei egin zion HBri talde armatuaren munduan eragina izan dezan, «bakean bizi nahi duten herritarren kontra estortsioak ez egiteko».

Ildo berean, EB-IUko koordinatzaile nagusi Javier Madrazoren iritziz, «euskal gizarteari mespretxua adierazten dio ETak. Herriaren izenean hitz egiten du, baina eskubideak urratzen ditu. Hori arbuigarria da».

Bestetik, Gipuzkoako PPko presidente Maria San Gilek esan zuenez, «lehergailu hau jarri duten sikarioak epaitu eta zigortuko ditu Justiziak, herri honetan sortzen ari diren sufimenduari».

Azkenik, PSE-EEko idazkari nagusi Nicolas Redondo Terrerosek Arzalluzen hitzak gogoratu zituen. Britainiako dinamitarren lapurretaz Arzalluzek esan zuen «balentria bat» izan zela.

LABURAREN

Preso eta errefuxiatuen etxeratzea eskatzeko hainbat ekitaldi egingo dira Arbizon etzi arte

Arbizuko Itzalpe Plataformak hainbat ekitaldi antolatu ditu gaur, bihar eta etzi euskal preso eta errefuxiatuen etxeratzea eskatzeko. Gaur 21:00etan Udalean desobediencia zibilaren inguruko hitzaldia emanen dute Bai Euskal Herriari, Euskal Abokatuen Elkargoak, Joxemi Zumalabe Fundazioak eta Presoekiko Elkartasuna taldeko kideek. Bihar 12:00etan frontoian pilota partiduak jokatu dira eta 23:00etan Oskorrik kontzertua eskainiko du. Etzi, 20:00etan manifestazio isila deitu dute. Ordu bat beranduago bertso afaria eta senideei omenaldia egingen zaie.

Kritika politikoa egitea zilegi dela erantzun dio HBk Prentsa Elkarteari

Donostiako Prentsa Elkarteari erantzun zion atzo Herri Batasunak. Jakina denez, Carmen Gurrutxaga kazetariak HBren zuzendaritzari buruzko artikulua kaleratu zuen joan den astean. HBk Gurrutxagak idatzitakoa kritikatu zuen, eta horren ondotik Prentsa Elkarteak ohar bat kaleratu zuen HB kritikatuz. HBk atzo adierazi zuenez, Prentsa Elkartearen jarrera «okerra eta irrazionala» da. Kritika politikoa egitea zilegi dela adierazi zuen. Prentsa Elkarteak HBri «ETArekin bat egitea eta faxista izatea» egotzi ziola-eta, horren atzean HB «kriminalizatzeko» saioa besterik ez dagoela adierazi zuen alderdiak.

Hernaniko EA, EAJ eta PSE-EEk agiria sinatu dute «indarkeria giroari elkarrekin erantzuteko»

Hernaniko (Gipuzkoa) Udaleko EA, PSE-EE eta EAJk agiria sinatu zuten astearte iluntzean «elkarrekin herriko indarkeria giroari erantzuteko». Herri horretan EHk du gehiengo absolutua. Alderdi horiek sinatutako agiriak dio «konpromiso etiko eta demokratikoa» hartzen dutela herriko giroari aurre egiteko. Beraien hitzetan, «eraso eta intimidazio» egoeran bizi dira herritarrak, eta askatasuna murriztua duten «ondorioen beldur». Agiria sinatu dutenek elkarriketa bultzatzeko asmoa iragarri dute.

EA

Herrien Europako Konstituzioa eskatu du EAK Bruselan

Europa Press | **BILBO**

Europarako Konstituzio bat eskatu zuten atzo Euskal Herri osotik joandako EAKo ordezkariak Bruselan. Eskaera hori jasotzen duen adierazpena zabaldu zuten. Europako Komunitateen Tratatuen aldaketa dela-eta, Gorka Knörr eurodiputatuak Europarako Konstituzio bat defenditu zuen, «baina herrien Europako Konstituzioa, non Estaturik gabeko nazioek edo erregioek bere etorkizuna definitu ahal izango duten Europako Batasunean». EBn Estaturik gabeko nazioak izatea defenditu zuten EAKo ordezkariak.

Herrien Europarako Konstituzioa eskatzeaz gain, Oinarrizko Eskubideen Gutuna Konstituzio horretan integratzeko eskatzen dute eta herrien autodeterminazio eskubidea jasotzeko. Horretaz gain aniztasun kulturala errekonozitzeko eskatzen dute, eta «elkartasun eta justizia sozialean» oinarritutako Europa izan dadila.

PSN-UPN

Asun Apestegia Nafarroako ararteko izan dadin PSNk eginiko proposamena baztertu du Sanzek

Erredakzioa | **IRUÑEA**

Juan Jose Lizarbe PSNko idazkari nagusiak Asun Apestegia PSOeko Batzorde Federaletako iruindarra Nafarroako ararteko izateko egin zuen proposamena ez du onartu Miguel Sanz presidentek. Parlamentuak duela urte eta erdi onartu zuen Foru Erkidegoan Arartekoa eratzeko legea.

Orduan UPNk Victor Manuel Arbeloa, *Otano* auziaren ondotik PSN zuzentzeko gestorako buru izan zena proposatu zuen. Erregionalistentzako «prestatuntza eta orain arte egindako lanagatik» egokia zen kargurako. Alta, sozialistek eurei deus esan gabe proposatzeaz gain, ez zitzaizela egokia iruditzen erantzun zuten. Oraingoan berriz, Sanzek Apestegiak esperientzia politiko handia duela onartu arren, zuzenbide arloan ez dituela «behar diren baldintzak» betetzen erantzun dio Lizarberri. Hautagaiak aurkezteko epea abenduaren 1a artekoa zen, baina UPNk eta PSNk Parlamentuko Mahaian gehiengoak dutenez 18ra atzeratu dute.



INIGO AZKONA

Zazpi 'solidario' atxilotu zituen Ertzaintzak Bilbon

Erredakzioa | **BILBO.** Presoen sakabanaketaren ondorioz errepideetan gertatzen diren istripuak salatzeko, ibilgailu bat irauli zuten herenegun Presoekin Elkartasuna taldeko zazpi kidek Bilboko Ernesto Erkoreka plazan. Horrekin batera, udaletxearen aurrean eta inguruan pankarta ba-

tzuk eskegi zituzten. Ertzaintzak zazpi kideak identifikatu eta atxilotu zituen eta Deustuko komisariara eraman zituzten. Ordena publikoa nahastea egotzi zioten. Atxilotuak Eider Uruburu, Roberto Gonzalez, Jose Maria Ortigosa, Ianire Couceiro, Belen Medel, eta I.H. eta A.A. adin txikiak dira. Atzo arratsaldean oraindik ez zuten epailearen aurrean deklaratu. Amnistiaaren aldeko Batzordeak jakinarazi zuenez, «ziegetan hiru erantzain kaputxadunek argazkiak atera zituzten irain eta mehatxuen artean».